

# TITO

## ITLAJKUILOL ON APÓSTOL SAN PABLO PARA TITO

---

### Pablo okitlajkuiluij Tito

**1** <sup>1</sup>Nejua, Pablo, niitekipanojkau Dios niman niapóstol\* itech JesuCristo. JesuCristo onechajtítlan para onikinuajkuilij, niman para ma ueyiya intlaneltok on yejuan Dios okintlapejpenij, niman para kixmatischej on tlen melauak de totlaneltok, <sup>2</sup>niman para kipiymaskej tlamachalistli\* ipan in yenkuik nemilistli yejuan para nochipa. Dios, yejuan xueli tekajkayaua, okitlalij ipan ipromesa on yenkuik nemilistli ijkuak in taltikpaktli xe onkatka. <sup>3</sup>Niman aman yoyejkok on kuajli tiempo para otechititij itemachtli. Dios toTemakixtijkau onechnauatij para nikteijlis.

<sup>4</sup>Nimitsijkuilouilia in tlajkuilolamatl, tejua Tito, nomelauakoneu ikan tlaneltoktli yejuan tiomemej tikpiyaj. Nimitsnekilia ma Dios toTajtsin niman JesuCristo toTemakixtijkatsin ma mitsmaka iueyitetlajsojtlalis\*, niman iyolseuilis.

### Itekiu Tito ne ipan on tlaluaktli Creta

<sup>5</sup>Onimitskau ipan on tlaluaktli itoka Creta para xchiua tlinon nejua xonítlan, niman para tikintlalis on ueuetkej tlayekankej itech toknluan ipan itekiu Dios kampa tlaneltokaj ipan cada kalpan, sano ijki ken nejua onimitsnauatij. <sup>6</sup>Sen ueuetki tlayekanki itech toknluan ika onkaj kuajli nouikas para maka yakaj itlaj kitlajtlakolmakas. Ika onkaj kipiymas san se isiuau. Niman ikoneuan ika onkaj tlaneltokakej yeskej, niman tetlakamatischej niman maka kinteixpanuiskej itlaj ika tlen xkuajli kichiuaj. <sup>7</sup>Pampa se tlayekanki kipiymas ueyi compromiso ipan sen tiopan, yejua noneki kuajli nouikas para maka yakaj itlaj ika kijixkomakas\*.

Xkitocaroua noueyimatis, nion nimantsin kualanis, nion xtlauantinemis, nion xkitejtemotinemis tlauejli, nion xkuejelitas kiteixpachouilis tomin. <sup>8</sup>Yej nochi kuajli kichiuas. Ika onkaj nochipa kuajli kinselis itenotskauan ipan ichan, kuelitas nochi tlen kuajli, kuajli noyekanas, yolmelajki, yolchipauak niman ika onkaj kiyekanas kuajli inemilis. <sup>9</sup>Ika onkaj kejeuas on melajki temachtistli yejuan yokiselij intech temachtijkej, para ijki no uelis kinyoleuas oksekimej ika on melajki temachtijli niman kinyolyemanilis on yejuan tlaixnamikij.

<sup>10</sup>Ika onkaj ijki kichiuas, pampa miyekej nemij on yejuan xtetlakamatij, niman más ne intsajlan on hebreos\*. Yejuamej kijittouaj on tlen xitlaj\* kijtosneki, niman kinkajkayauaj on tlakamej. <sup>11</sup>Kenomej xkinkamatsakua, pampa kintlamachilipopolouaj nochi sesentetipan familias ika temachtiaj on tlen xkitocaroua. Niman ijin kichiuaj para kitlanij tomin ikan tlakajkayualistli. <sup>12</sup>Se intiotlajtojkausan sano ompa chanej Creta okijtoj: “Nochanekauan\* sanoyej\* chakuamej, no ken yolkej yejuan xkuajkualtin, sanoyej tlakuanij niman tlatsijkej.” <sup>13</sup>Niman yejua okijtoj tlen melauak. Yejua ika, xkinmajua chikauak para ma kipiayakan kuajli intlaneltok. <sup>14</sup>Xkinmajua para maka ma kakikan on tlajtlamach\* cuentojtlajtolin yejuan kixnamiki on tlen melauak yejuan on hebreos\* kinejnemiliaj, nion maka ma kakikan intlanauatil on tlakamej yejuan kitlalkauiyaj on tlen melauak.

<sup>15</sup>Para on yejuan kipiayaj intlamachilis chipauak, nochi tlajtlamach\* chipauak para yejuamej. Pero para yejuamej on yejuan xtlaneltokaj niman xkiyayaj inyojlo chipauak, para yejuamej xitlaj\* onkaj tlen chipauak pampa hasta on tlen kinemiliaj niman on intlamachilis yejuan kintlakolmaka xchipauak. <sup>16</sup>Kijtouaj ika kixmatij Dios, pero ika on tlen kichiuaj kiteititiaj ika xnejli. Yejuamej tej, sanoyej tetlauelitaj, niman xtetlakamatij, niman nion se tekittl yejuan kuajli xkichiuaj.

### On kuajli temachtistli

**2** <sup>1</sup>Pero on tlen tikijtos ika onkaj kuajli iuan nouikas on kuajli tlamachtijli. <sup>2</sup>Xkimijli on ueuentsitsimej ma kintelti inxkuajlieleuilis, ma nemikan ken uelis kintlakaitaskej, ma nemikan ikan kuajli tlamachilistli, ma kipiayakan kuajli intlaneltok niman on tetlajsojtlalilstli\* niman ma kipiayakan ijyouilistli. <sup>3</sup>No ijki xkimijli on lamajtsitsimej ma yolchipajkanemikan, maka

ma tetejteneuakan niman maka sa tlauantinemikan. Yejuamej ma kitemachtikan on tlen kuajli. <sup>4</sup>Ma kintitikan on siuamej yejuan kokonej kenijki kintlajsojtlaskej inueuentsitsiuian, niman inkoneuan. <sup>5</sup>No ijki ma kiteltikan iminxkuajliieleuilis, ma noyekanakan kuajli, ma chipajkanemikan, ma tlayekanakan kuajli ipan inchan, ma yolyemankanemikan, niman ma kintlakamatikan inueuentsitsiuian ikan tetlakaitalistli, para maka yakaj kijtouilis tlen xkuajli on itlajtoltsin Dios.

<sup>6</sup>No ijki xkinyoleua on telpokamej para no ma kuajli kitetlalikan iminxkuajliieleuilis. <sup>7</sup>Niman tejua xkinmachi ikan moejemplo nochi tlajtlamach\* tlen kuajli. Ijkuak tikinmachtis, xkinmachi ikan tlen melauak niman ikan nochi moyojlo. <sup>8</sup>Nochipa xtemachi tlen kuajli para maka yakaj kijtouilis tlen xkuajli on temachtitin, niman ijkon pinauas san akinon yejuan kinakis techistlakos.

<sup>9</sup>Xkinyoleua on esclavos para ma kintlakamatikan inteko ikan nochi tlen kuajli tekiti. Ma kinyolpaktikan, niman maka ma tenajnankilikan. <sup>10</sup>Niman xkinnauati maka ma tlachtekan, yej kemaj nochi kuajli ma kichiuakan para on inteko kintlaliskej inyojlo intech. Ijkon tej, nochimej kimatiskej ika on itlemachtitl Dios toTemakixtijkau yejua sanoyej\* kuajli.

<sup>11</sup>Dios ikan iueyitetlajsojtlalis yejuan xakaj tlakatl kitocarouaya kiselis yokipanextij temakixtilistli para nochi tlakatl. <sup>12</sup>On iueyitetlajsojtlalis\* Dios techmachtia ma tikajkauakan nochi tlen xkuajli niman nochi xkuajli eleuilistli\* yejuan onkaj ipan in tlaltikpaktli. Niman no techmachtia ma kuajli titouikakan, ma tiyolmelajkanemikan niman ma tiyeknemikan ipan in tlaltikpaktli. <sup>13</sup>Ijkin ma tikchiuakan chika yejko on ueyi tonajli yejuan itech tikpiyaj totlamachalis\*. Ipan on ueyi tonajli uajlas toueyi Dios yejuan toTemakixtijkatsin Jesu Cristo. <sup>14</sup>Yejua san topampa onotemakak ipan mikilistli para techmakixtia itech nochi kech tlajtlakojli onkaj, niman para techchipaua kuajli. Yejua otechchipau para technoyaxkatia\*, niman para tikpiyaskej miyek nekilistli para tikchiuaskej nochi tlen kuajli. <sup>15</sup>In yejua xtemachi.

No ijki xteyoleua niman xtechikajkanotsa ikan nochi motlanauatil. Xmota tejua, maka yakaj mitspijpinauis.

### Ijkin noyekanaskej on tlaneltokakej

**3** <sup>1</sup>Xkinmelnamikti on tlaneltokakej para ma kintlakaitakan on yejuan tlayekanaaj niman on yejuan kipiay ueyitekiuayotl.

Ma kintlakamatikan niman ma kipiayakan inyojlo para kichiuaskej nochi tlajtlamach\* tlen kuajli. <sup>2</sup>Maka yakaj ma kiteneuilikan on tlen xkuajli, yej ma nemikan inuan oksekimej ikan yolseuilistli, niman ma tenotskej, niman ma kiteititikan yolyemanilistli itech nochi tlakatl.

<sup>3</sup>Achtopa tejuamej no xkuajli titlanemiliayaj niman xtite-tlakamatiyaj. No tixpolijtinemiyaj niman tinemiyaj ipan nochi sesekneka eleuilistli\* niman pakilisyotl yejuan xkuajli. Tinemiyaj ipan on tlen xkuajli niman ipan nexikolyotl. Oksekimej techtlauelitayaj niman tikintlauelitayaj. <sup>4</sup>Pero ijkuak Dios toTemakixtijkatsin otechitij inekilis niman itetlajsojtlalis\*, <sup>5</sup>otechmakixtij. Pero otechmakixtij xpampa tejuamej otikchijkej on tlen kuajli, yej pampa yejua otechiknelij. Otechmakixtij ikan iEspíritu Santo yejuan otechpajpak para tikpiyaskej yenkuik nemilistli, niman yejua otechyenkuilij. <sup>6</sup>Dios otechtlayokolij sanoyej\* miyek iEspíritu itechkopa JesuCristo toTemakixtijkatsin, <sup>7</sup>para ikan iueyitetlajsojtlalis\* JesuCristo, Dios kiteneua ika nochi totlajtlakoluan yokintlajopoluij, niman ijki tikseliskej nemilistli para nochipa yejuan tikmachixtokej.

<sup>8</sup>Yejua in tlajtojli sanoyej melauak, niman nikneki para xtlanauati sanoyej ika in tlajtlamach\* para on yejuan kineltokaj Dios ma notakan sano yejuamej para kichiuaskej on tlen kuajli. Yejua in tlajtlamach\* sanoyej kuajli niman kimpaleuis nochimej. <sup>9</sup>Pero xtlalkaui on kamauijsokilistli yejuan xitlaj\* kijtosnekij, de on tlen kijkuilouaj inka toachtotajuan, niman on tlauejli yejuan kipiayaj niman kamauijsokilistli ika on itlanauatil Moisés. Nochi on xuelis kimpaleuis nion xitlaj\* kijtosneki.

<sup>10</sup>Tla yakaj kinxexelosneki on yejuan tlaneltokaj, xchikajkantsa sejpa noso okpa para maka ma kichiu. Tla xmitstenkaki, xkauili ma uiya, <sup>11</sup>pampa ika on tlen kichiu tikmatis ika on tlakatl kitlalkauiya on tlen kuajli niman kichiu tlajtlakojli. Niman sano yejua notlajtlakolmaka.

### **Pablo kimaka Tito sa ika nochi tlanauatijli**

<sup>12</sup>Ijkuak nejua niktitlanis motech Artemas noso Tíquico, xchiua kanika para xnechitaki ne Nikópolis, pampa nejua nikneki para ompa nikpanos on invierno. <sup>13</sup>Nochi ika on tlen tiuelis xpaleui Zenas, on tepantlajtojkatl, niman Apolos. Xkinmaka nochi tlen uelis para ika yaskej, niman maka itlaj ma kimpolo. <sup>14</sup>Niman

on tokniuan no ma kipiayakan impan inyojlo para kichiuaskej on tlen kuajli niman ijkon uelis kimpaleuiskej oksekimej ika on tlen kimpoloua. Ijkon innemilis itlaj ika ma tlapaleuikan.

### **Tlajpalouilistli niman tlatiochiualistli**

<sup>15</sup>Nochimej yejuan nouan nemij mitstlajpalouaj. Xkintlajpalo on totetlajsojkaikniuan\* yejuan kipiayaj imintlaneltok ken tejuamej.

Ma Dios mechtiochia nochimej nemejuamej ikan iueyitetlajsojtlalis\*. Ma ijki nochiua.